

# INUIT ATAQATIGIIT INATSIARTUNI



UKA2022/Imm. 116

Oktobarip 4-at 2022

Mariia Simonsen

**Uunga siunnersuut: Radiukkut tv-kkullu aallakaatitsisarneq pillugu Inatsisartut Inatsisaata allanngortinnissaa pillugu Inatsisartut inatsisissaattut siunnersuut.**

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

## **Oqaaseqaat:**

Kalaallit Nunaata Radiua pillugu inatsisip allannguutissaatut naalakkersuisut siunnersuutaat Inuit Ataqatigiinnit ima oqaaseqarfigissavarput:

Kalaallit Nunaata Radiua inuiaqatigiinnut kiffartuussisussaataavoq radiukkut tv-kkullu aallakaatitsisarneq pillugu Inatsisartut inatsisaanni aalajangersakkat tunngavigalugit. Kalaallit Nunaata Radiua Namminersorlutik Oqartussanit 19xx-imi oqartussaaffigineqalermalli atuisut, tamannami aamma sioqqullugu, atuisut isumaat siunnersuutissaallu pingaartinneqartarput, siullermik siulersuisoqanngikkallarmat programudvalginik taaneqartartut aqqutigalugit – tassa taamani kalaallisut taaguuteqaratik qallunaatuinnaq taaguuteqarallarmata. Programudvalgeqarneq KNR-i 1980-ikkut naaneranni siulersuisoqalermat naalaartartut isiginnaartartullu aallakaatitat pillugit toqqaannartumik isummersortarfeerupput, aatsaalli 2014-imi siulersuisut ikilineqarmata atuisut siunnersuisoqatigeeqalermata isummaminnik saqqummiiffissaqalerput - -fissaqaleraluarput. Tassami taama aqqissuussineq iluatsissimanngilaq – soorlu ippassigami maani suliarput alla aamma taamaattoq -

# INUIT ATAQATIGIIT INATSIARTUNI



inatsisiliorneq pissutsinut piviusunut naapertuutinngitsoq, taamaattumillu allanngortittariaqartoq. Tamanna ajuusaarnaqaaq, tassami inatsisiliavut tassaaniartussaagalarput iluaqutaasussat, asuli suliaanatik. Qujanartumilli inatsisit allanngortinneqarsinnaasarmata, massakkullu periarfissaqalerpugut aaqqissuussineq pitsaanerulersissallugu. Kalaallit Nunaata Radiuata inuiaqatigiinnik kiffartuussisussaataitanermini atuisut isumaat naalaartuartariaqarparaa, imaanngitsoq naalaartartut isiginnaartartullu sunik aallakaatitassiortoqarnissaa kisimik aalajangissammassuk, kisianni amigaateqarunik, isummersorusukkunik allatulluunniit isummaminnik apuuserusukkunik periarfissaqartariaqarmata. Tamanna nunani inuinnaat naalackersueqataanerannik ingerlatsiviusuni atuuttuuvoq.

Inatsisip matuma allanngortinneratigut nunatsinni radiumik naalaartartut, tv-mik isiginnaartartut nittartakkamillu atuisut periarfissaqalissapput isummaminnik apuussinissaminnut.

Inatsisip allannguutissaatut siunnersuummi KNR-i pisussaaffilerneqarpoq "innuttaasunik soqutigisalinnillu attuumassutilinnik oqaloqateqartarnermik qulakkeerinnissalluni, pingaartumik KNR-i qanoq ililluni pisussaaffimminik eqqortitsisinnaanersoq pillugu, allannguutissallu nassuiarneqarneranni allassimavoq tamanna pisinnaasoq atuisunik isumasiuisarnikkut allatigullu, aammali KNR-ip nammineq aalajangissagaa aqutit sakkullu suut atorlugit tamanna anguniassanerlugu.

Inatsisissamat allannguutissatut siunnersuut atuisunut tunngasoq Inuit Ataqatigiinni akuersaarparput, iluarivarpullu taamaaliorneq inatsimmi pisussaaffittut allassimammat. Erseqqissaqqissavarpulli atuisunik isumasiuisarnerit atuisullu kissaataat kisiisa aallakaatitassiorfiup inuiaqatigiinnik kiffartuussisup suliarisussaangimmagit, tunngavilli pingaartorujussuaq uaniimmat: kiffaanngissuseqarluni arlaannaanniilluunniillu

# INUIT ATAQATIGIIT INATSIARTUNI



tatisimaneqarani aallakaatitassiorsinnaaneq tunngaviummat  
pingaarutilerujussuaq.

Inatsimmi allannguutissap aappaa ussasaarinermit tunngasoq Inuit  
Ataqatigiinni aamma taperserparput. Qujanarpoq upperisarsiornermik  
politikkimilluunniit akiliilluni nittarsaassisinnaatitaannginneq inatsimmiilermat,  
taamalu erseqqissumik aalajangersagaalerluni, nalunaarutikkuinnaq  
aalajangersagaajunnaarluni.

Taama oqaaseqarluta naalakkersuisut allannguutissatut siunnersuutaat  
kultureqarnermit ilinniartitaanermullu ataatsimiititaliamut  
suliassanngortipparput.